

Na osnovu člana 61. i 73. Statuta Saveza lovačkih organizacija u Bosni i Hercegovini, Upravni odbor Saveza, na sjednici održanoj 27. 02. 2025. godine, donosi

PRAVILNIK O PRIZNANJIMA I ODLIKOVANJIMA ZA RAD NA UNAPREĐENJU LOVSTVA

I. OPĆE ODREDBE

Član 1.

Ovim Pravilnikom utvrđuju se kriteriji za imenovanje članova Komisije za dodjelu odlikovanja, vrste, kriteriji i način dodjele lovačkih priznanja i odlikovanja koja dodjeljuje Savez lovačkih organizacija u Bosni i Hercegovini (u daljnjem tekstu Savez).

Član 2.

Upravni odbor Saveza na prvoj sjednici nakon Izborne Skupštine imenuje Komisiju za dodjelu lovačkih priznanja i odlikovanja.

Član 3.

Za članove Komisije mogu biti predloženi lovci koji imaju veliki ugled u matičnoj lovačkoj organizaciji a odlikovani su najmanje jednim od ordena Saveza.

Član 4.

Komisija se sastoji od sedam (7) članova, gdje po jedan član dolazi iz svakog kantona u kojem Savez ima svoje članice.

Član 5.

Predsjednika Komisije i njegovog zamjenika biraju članovi Komisije na prvoj sjednici Komisije nakon imenovanja.

Član 6.

Lovačke organizacije-članice Saveza također ustanovljavaju vlastita priznanja za lovačke zasluge svojim članovima i drugim osobama na svom području, a u skladu sa svojim normativnim aktima i odredbama ovog pravilnika.

Član 7.

Lovačka priznanja i odlikovanja Saveza mogu se dodijeliti:

- lovačkim organizacijama,
- članovima lovačkih organizacija koje se ističu svojim doprinosom u razvoju lovstva,
- članovima Saveza koja imaju status pravnog lica koja su registrovana u Bosni i Hercegovini, koja se bave lovstvom, kao i unapređenjem i uzgojem, zaštitom i korištenjem divljači, kao i pravna lica koja se bave djelatnošću šumarstva i lovstva.
- drugim organima i organizacijama i pojedincima, koje svojim djelovanjem doprinose razvoju i unapređenju lovstva u Bosni i Hercegovini.

Član 8.

Pod zaslugama na razvoju, zaštiti i unapređenju lovstva podrazumijeva se rad na :

- uzgoju, zaštiti i naseljavanju divljači,
- naučnoistraživačkom i stručnim radovima u lovstvu,
- stručnom obrazovanju i uzdizanju kadrova u lovstvu,
- unapređenju lovišta,
- razvoju lovne kinologije,
- suzbijanju krivolova i ostalih nezakonitih radnji u lovstvu,
- razvoju lovnog streljaštva, podršci i unapređenju lovne etike i afirmaciji lovstva uopće,
- kao i za druge zasluge koje su od općeg interesa za lovstvo .

Član 9.

Prijedlog za dodjelu lovačkih priznanja i odlikovanja pojedinim osobama mogu uputiti :

- lovačke organizacije članice Saveza ;
- članovi organa Saveza, uz konsultacije sa Upravnim odborom;
- ostale organizacije i pojedinci čiji su rad i djelovanje u vezi sa lovstvom ili ako svojom djelatnošću doprinose razvoju lovstva.
- Prijedlog za dodjelu lovačkog odlikovanja ili priznanja članici Saveza ili drugoj lovačkoj organizaciji u BiH i izvan nje mogu dati Skupština Saveza ili Upravni odbor Saveza.

Odluku o dodjeljivanju priznanja i odlikovanja donosi Upravni odbor Saveza na prijedlog Komisije za priznanja i odlikovanja. Odluka Upravnog odbora o dodjeli priznanja i odlikovanja je konačna.

2. VRSTA I IZGLED ODLIKOVANJA I PRIZNANJA SAVEZA

Član 10.

Lovačka priznanja i odlikovanja su:

1. Zahvalnica za lovački podmladak,
2. Zahvalnica za zasluge u lovstvu sa značkom Saveza,
3. Orden za lovačke zasluge II reda sa diplomom,
4. Orden za lovačke zasluge I reda sa diplomom,
5. Jubilarna plaketa Saveza,
6. Plaketa Saveza,
7. Zlatni orden Saveza sa diplomom,
8. Počasno zvanje-Počasni član Saveza.

- ZAHVALNICA za lovački podmladak za zasluge u lovstvu, diplomu propisuje Upravni odbor Saveza na prijedlog Stručne službe Saveza.
- ZAHVALNICA sa značkom Saveza za zasluge u lovstvu je od mesinga prečnika 12x 18 mm i ima izgled grba Saveza. Diplomom propisuje Upravni odbor Saveza na prijedlog Stručne službe Saveza.
- ORDEN ZA LOVAČKE ZASLUGE II REDA je od mesinga, bakarno patiniran, veličine 40x30 mm, ovalnog oblika, omeđen sa strane utisnutom grančicom. U sredini je utisnut amblem glave srndaća i natpis "Savez lovačkih organizacija u BiH"; ispod toga je u polukrugu na emajliranoj traci natpis "Orden za lovačke zasluge" i pri dnu natpis na emajliranoj zelenoj podlozi "II reda". Diplomom uz Orden za lovačke zasluge II reda propisuje Upravni odbor Saveza na prijedlog Stručne službe Saveza.
- ORDEN ZA LOVAČKE ZASLUGE I REDA je od mjedi, presvućen pozlatom, iste je veličine i oblika kao i Orden II reda s tim, što je sa strane osim grančice omeđen zelenim trakama na emajliranoj podlozi širine 2,5 milimetara. U sredini je utisnuta glava divojarca i natpis "Savez lovačkih organizacija u BiH"; ispod toga u polukrugu stoji natpis "Orden za lovačke zasluge I reda". Diplomom uz Orden I reda za lovačke zasluge propisuje Upravni odbor Saveza na prijedlog Stručne službe Saveza.
- JUBILARNU PLAKETU Saveza propisuje Upravni odbor Saveza na prijedlog Stručne službe Saveza.
- PLAKETU Saveza propisuje Upravni odbor na prijedlog Stručne službe Saveza.
- ZLATNI ORDEN SAVEZA SA DIPLOMOM je posebno odlikovanje Saveza ono je od mesinga sa pozlatom, prečnika 45 mm u čijem vjencu se nalazi natpis Savez lovačkih organizacija u BiH, u dnu ordena je natpis Zlatni orden a u njegovom centru je ugravirana zgrada Saveza. Diplomom Zlatni orden propisuje Upravni odbor na prijedlog Stručne službe Saveza, a dodjeljuje na prijedlog Komisije za priznanja i odlikovanja.
- POČASNO ZVANJE (počasni član) je pločica sa amblemom Saveza, izgraviranim natpisom „Počasni član" u prvom redu te „Prezimenom i imenom". Diplomom sa obilježjem počasnog člana propisuje Upravni odbor Saveza na prijedlog Stručne službe Saveza.

3. DODJELA ODLIKOVANJA I PRIZNANJA SAVEZA:

Član 11.

- Zahvalnica za lovački podmladak je priznanje namijenjeno prvenstveno maloljetnim osobama pripravnici, starosne dobi do 17 godina, koji su se iskazali u radu u lovačkoj organizaciji i koji su dali zapažen doprinos na unapređenju lovstva.
- Zahvalnica za zasluge u lovstvu dodjeljuje se lovačkim organizacijama i članovima lovačkih organizacija koje su u određenom periodu doprinjele razvoju lovstva, lovne kinologije i ekologije u matičnoj organizaciji i na širem području regije gdje djeluje. Za pojedince potrebno je uz prijedlog dostaviti i fotokopiju priznanja koje je kandidat dobio od lovačke organizacije u prethodnom periodu.
- Orden za lovačke zasluge II i I reda dodjeljuje se lovačkim organizacijama i članovima lovačkih organizacija koje su svojim radom kroz duži period doprinjele napretku svoje organizacije, unapređenju lovstva na širem području i kao aktivni članovi imaju određene zasluge na afirmaciji lovstva, lovačke organizacije i SLOuBiH. Za pojedince potrebno je uz prijedlog dostaviti i fotokopiju prethodno dodjeljenog priznanja .
- Jubilarna plaketa Saveza je posebno priznanje koje se dodjeljuje, na prijedlog lovačke organizacije ili članova organa Saveza, svake pete godine od godine postojanja Saveza, lovačkim i drugim organizacijama te pojedincima za dugogodišnji doprinos na razvoju i unapređenju lovstva na teritoriji Bosne i Hercegovine i šire.
- Plaketa Saveza je posebno priznanje koje se dodjeljuje organizacijama i pojedincima koji nisu članovi Saveza a dali su veliki doprinos na afirmaciji i unapređenju Saveza i lovstva uopće.
- Zlatni orden sa diplomom je posebno odlikovanje Saveza koje se dodjeljuje pojedincima i u izuzetnim slučajevima lovačkim organizacijama koje su dale veliki doprinos na afirmaciji i unapređenju Saveza i lovstva uopće na internacionalnom nivou.
- Počasni član je posebno priznanje koje se dodjeljuje određenoj osobi za njezin nesebičan dugogodišnji rad i djelovanje u oblasti lovstva i koja je stalno doprinosila jačanju i afirmaciji lovačke organizacije, Saveza i lovstva uopće, i koja se naročito ističe na polju lovne etike .

4. USLOVI ZA DODJELU ODLIKOVANJA

Član 12.

1. Za Zahvalnicu za lovački podmladak se može predložiti maloljetna osoba koja se vodi kao podmladak u lovačkoj organizaciji najmanje 2 (dvije) godine, što se dokazuje kopijom članske knjižice podmladka koju izdaje Savez, a koja se dostavlja uz obrazac.
2. Za Zahvalnicu može se predložiti osoba sa najmanje 7 (sedam) godina lovačkog staža, da ima najmanje dva priznanja u skladu sa pravilnikom matične lovačke organizacije te da ispunjava uslove iz člana 11. ovog Pravilnika.
3. Za Orden II reda za lovačke zasluge može se predložiti osoba sa najmanje 15 (petnaest) godina lovačkog staža i pod uslovom da joj je Upravni odbor Saveza dodijelio Zahvalnicu za zasluge kao i da je proteklo najmanje 8 (osam) godina od dodjele Zahvalnice Saveza i pod uslovima člana 11. ovog Pravilnika.
4. Za Orden I reda može se predložiti osoba koja ima najmanje 20 (dvadeset) godine lovačkog staža, i da je od dodjele Ordena II reda prošlo najmanje 5 (pet) godina i pod uslovima iz člana 11. ovog Pravilnika.
5. Za Jubilarnu plaketu Saveza može se predložiti član lovačke organizacije koji ima najmanje 20 (dvadeset) godina lovačkog staža i koji je odlikovan jednim od Ordena Saveza, da se posebno istaknuo na jačanju i afirmaciji SLOuBiH kao i da ispunjava uslove iz člana 11. ovog Pravilnika. Jubilarna plaketa Saveza članici Saveza, drugim organizacijama i pojedincima koji nisu članovi lovačke organizacije dodjeljuje na prijedlog lovačke organizacije ili članova organa Saveza bez posebnih uslova propisanih ovim Pravilnikom.

6. Za Plaketu Saveza može se predložiti organizacija ili pojedinac koji nisu članovi lovačkih organizacija, a dali su nemjerljiv doprinos na afirmaciji i unapređenju Saveza i lovstva uopće.
7. Zlatnim ordenom sa diplomom u izuzetnim slučajevima, Upravni odbor Saveza može odlikovati, članice lovačkog Saveza i njihove članove koji su dali veliki doprinos na afirmaciji i razvoju lovstva u BiH i afirmaciji SLOuBiH na internacionalnom nivou.
8. Počasni član lovačke organizacije-članice Saveza može postati lice koja je u svojoj lovačkoj karijeri navršilo najmanje:
 - 30 (trideset) godina lovačkog staža i da je odlikovano Ordenom I reda,
 - 35 (tridesetpet) godina lovačkog staža i da je odlikovano Ordenom II reda,
 - 40 (četrdeset) godina lovačkog staža i da je dobitnik Zahvalnice Saveza. U izuzetnim slučajevima može se proglasiti počasnim članom lice koje ima najmanje 45 godina lovačkog staža bez priznanja i odlikovanja Saveza za koje predlagač dostavlja posebno pismeno obrazloženje u kojem će argumentovati svoj prijedlog.

Nakon što se osoba proglasi Počasnim članom, može joj se dodijeliti samo još Zlatni orden Saveza i Jubilarna plaketa u skladu sa članom 12. Pravilnika, ali ne i druga lovačka priznanja i odlikovanja koja propisuje Savez.

Po dobivanju saglasnosti Saveza proglašenje počasnog člana vrši lovačka organizacija-članica Saveza na prigoda način.

Počasni član ima prava redovnog člana, pa tako i pravo na člansku markicu. Lovska organizacija može preuzeti plaćanje članskih obaveza prema Savezu i pretplatu na "Lovački list" za počasnog člana ukoliko ga je u skladu sa svojim statutarnim odredbama oslobodila plaćanja redovne članarine u lovačkom društvu.

Član 13.

Lovačka priznanja i odlikovanja Saveza, lovačkim organizacijama i njihovim članovima dodjeljuju se postupno, počev od Zahvalnice pa dalje, bez mogućnosti preskakanja jednog od odlikovanja.

Odlikovanja Saveza dodjeljena članovima lovačkih organizacija važe i vode se u evidenciji u lovačkoj organizaciji u kojoj su oni članovi i važe samo u toj lovačkoj organizaciji. Lovci koji su članovi u dvije ili više lovačkih organizacija, odlikovanja mogu dobiti u skladu sa članom 11. pravilnika, izuzev odlikovanja Počasni član koje mogu dobiti samo u matičnoj lovačkoj organizaciji.

5. NAČIN PREDLAGANJA I DODJELJIVANJA PRIZNANJA I ODLIKOVANJA OD STRANE LOVAČKE ORGANIZACIJE

Član 14.

Prijedlog za dodjelu jednog od priznanja i odlikovanja za lovačke zasluge Savezu upućuju organizacije i članice Saveza na propisanom obrascu, koji je prilog ovog pravilnika, u 7 primjeraka nakon što su ispunjeni uslovi u skladu sa članom 12.

Lovačka društva mogu predložiti za dodjelu priznanja Saveza do 3 (tri) % od ukupnog broja članstva gdje će troškove izrade priznanja snositi Savez.

Ukoliko se ukazala potreba, lovačka organizacija može predložiti do 5 (pet) % od ukupnog broja članstva s time da će troškove izrade do 3 (tri)% snositi Savez dok će izradu odlikovanja za preostalih 2 (dva)% snosti lovačka organizacija direktnom uplatom na račun Saveza u iznosu od 30,00 KM po odlikovanju nakon ispostavljenih fakture od strane Saveza.

U izuzetnim slučajevima lovačka društva koja obilježavaju jubilej mogu predložiti do 5% od ukupnog članstva za sve vrste priznanja, a troškove izrade priznaja će u potpunosti snositi Savez.

Broj članstva utvrđuje se po osnovu evidencije koju vodi Stručna služba Saveza, na bazi preuzetih i plaćenih članskih markica za godinu za koju se razmatraju prijedlozi.

Upravni odbor Saveza na prijedlog Stručne službe propisuje posebne obrasce za dodjelu lovačkih odlikovanja, koje predlagači treba da uredno popune, dokumentuju i dostave na razmatranje.

Obrasci za prijedloge se šalju u lovačke organizacije ili se mogu preuzeti na web stranici Saveza.

Član 15.

Članice Saveza ne mogu predlagati kandidate za dodjelu priznanja i odlikovanja koja dodjeljuje Savez u slijedećim slučajevima :

1. Neplaćanjem obaveza prema Savezu,
2. Kršenjem i nepridržavanjem potpisanog ugovora sa Savezom,
3. Ako provode aktivnosti koje su u suprotnosti sa ciljevima i djelatnostima Saveza, Statutom i aktima Saveza i odlukama organa Saveza.
4. Prestankom svojstva pravnog lica.

Član 16.

Komisija za priznanja i odlikovanja razmatra prijedloge u skladu sa ovim Pravilnikom i donosi mišljenje o njihovom usvajanju ili odbacivanju. Mišljenje Komisije se dostavlja Upravnom odboru Saveza koji ga može u cjelosti ili djelimično usvojiti, preinačiti ili pak odbiti ukoliko utvrdi da pojedini prijedlozi ne zadovoljavaju utvrđene kriterije za pojedina odlikovanja ili naknadno dođe do saznanja da predložena osoba zbog nekih razloga ne može dobiti lovačko priznanje ili odlikovanje.

U slučaju odbijanja, odnosno preinačenja prijedloga, predlagaču se predmet vraća uz obrazloženje.

Član 17.

Lovačka priznanja i odlikovanja ne mogu se dodjeljivati osobama koje su kažnjene za disciplinski prijestup u lovstvu, odnosno krivično djelo u bilo kojoj oblasti ili za koje postoji sumnja da su sklone ili bile sklone krivolovu i drugim nezakonitim radnjama, a predlagač koji je to svjesno prešutio za svoje postupke će odgovarati pred Sudom časti.

Član 18.

Dodjela priznanja i odlikovanja se vrši jedanput godišnje, i to po mogućnosti 25. aprila koji je zvanični dan osnivanja Saveza (1925. godine). Ukoliko postoji potreba Komisija za odlikovanja i priznanja može se sastati i prije pomenutog termina.

U izuzetnim slučajevima, ukoliko je ekonomski opravdano, na zahtjev Upravnog odbora prema ukazanoj potrebi Komisija za priznanja i odlikovanja može razmatrati prijedloge i više puta godišnje, te ih u putiti Upravnom odboru na konačnu odluku.

Član 19.

Prijedlozi za odlikovanja i priznanja dostavljaju se Stručnoj službi Saveza najkasnije do 31. marta. Kada se u Savezu prikupe prijedlozi iz lovačkih organizacija, saziva se Komisija za priznanja i odlikovanja.

Član 20.

Prijedlozi za odlikovanja i priznanja koji pristignu u periodu iza 31. marta će biti razmatrani naredne godine ako drugačije ne odluči Upravni odbor Saveza.

Član 21.

Priznanje i odlikovanje sa diplomom jedne vrste može biti dodijeljeno predloženom samo jedanput.

Član 22.

Priznanja i odlikovanja predaju se nagrađenoj osobi u pravilu na prigodan način u lovačkoj organizaciji, a predaju vrši, po mogućnosti, ovlašteni predstavnik Saveza.

Član 23.

Evidenciju o izdatim odlikovanjima i priznanjima Saveza dužna je voditi Stručna služba Saveza i lovačka organizacija za svoje članove.

5. PRIZNANJA KOJA DODJELJUJU ČLANICE SAVEZA

Član 24.

Članice Saveza također mogu ustanoviti vlastita priznanja za svoje članove i druge osobe i organizacije zaslužne za rad na unapređenju lovstva na svom području.

Priznanja koja članice mogu ustrojiti su:

- prigodna zahvalnica za rad na razvoju lovačke organizacije i
- priznanje za rad i doprinos na afirmaciji lovačke organizacije i lovstva općenito za svoje članove.
- i druge vidove odlikovanja i priznanja koje će propisati u skladu sa svojim aktima.

Veličinu, oblik kao i tekst zahvalnice i priznanja propisuje članica koja ih dodjeljuje .

Priznanja koja dodjeljuju članice Saveza ne mogu se dodjeljivati osobama suprotna članu 17. ovog Pravilnika. Bliže odredbe o postupku i načinu dodjele vlastitih priznanja propisat će članice Saveza svojim aktom koji neće biti u suprotnosti sa ovim Pravilnikom.

Član 25.

Imena odlikovanih osoba i organizacija kao i počasnih članova po potrebi se objavljuju u "Lovačkom listu", glasniku lovaca Bosne i Hercegovine.

6. ODUZIMANJE ODLIKOVANJA

Član 26.

Oduzimanje lovačkog odlikovanja, odnosno priznanja može se izvršiti u slučajevima ako se tačno utvrdi da je pojedinac odnosno organizacija kojima je ono dodijeljeno učinilo bilo kakve radnje koje narušavaju ugled lovačke organizacije ili Saveza i predstavljaju krivični ili etički prijestup.

Odlikovanje ili priznanje se može oduzeti na zahtjev predlagača, Komisije za odlikovanja i priznanja, Upravnog odbora Saveza ili na zahtjev člana organa Saveza po saznanju .

Prijedlog za oduzimanje odlikovanja/priznanja treba da bude obrazložen, a konačnu odluku o tome donosi Upravni odbor Saveza.

Zabrana prava posjedovanja oduzetog odlikovanja objavljuje se u "Lovačkom listu", glasniku Saveza lovačkih organizacija u BiH.

Član 27.

Oduzeto odlikovanje, odnosno priznanje na način i po postupku iz prethodnog člana ovog Pravilnika ne može se ponovo dodijeliti osobi ili organizaciji kojoj je oduzeto.

O oduzetom priznanju/odlikovanju se vodi evidencija od strane Stručne službe Saveza.

7. PRELAZNE I ZAVRŠNE ODREDBE

Član 28.

Autentično tumačenje ovog Pravilnika daje Upravni odbor Saveza.

Član 29.

Odredbe ovog pravilnika stupaju na snagu danom usvajanja na Upravnom odboru SLOuBiH, kada prestaje da vazi Pravilnik donesen 19.12.2022. godine.

Broj: 01-010-2/25

Sarajevo, 27.02.2025. godine

Predsjednik Upravnog odbora
Muhamed Hodžić